

**PEMBERITAHUAN PERTANYAAN**

**DEWAN RAKYAT, MALAYSIA**

**PERTANYAAN : LISAN**  
**DARIPADA : Y.B. Dr. Noor Azmi bin Ghazali**  
**[ Bagan Serai ]**  
**TARIKH : 17.03.2014 (Isnin)**  
**NO. SOALAN : 67**

**Y.B. Dr. Noor Azmi bin Ghazali [ Bagan Serai ] minta**  
**MENTERI PERDAGANGAN ANTARABANGSA DAN INDUSTRI**  
**menyatakan:-**

- a) apakah fungsi Pusat Sokongan Halal Global di Halal Industry Development Corporation (HDC); dan**
- b) setakat ini apakah pencapaian pusat tersebut.**

## JAWAPAN

Tuan Yang Di Pertua,

Kerajaan menerusi Halal Industry Development Corporation (HDC) telah membangunkan Pusat Sokongan Halal Global (GHSC) pada tahun 2009 bertujuan untuk menjadikan Malaysia sebagai Pusat Rujukan Halal Global.

Fungsi GHSC adalah sebagai sebuah pusat rujukan bagi syarikat, pelabur, penyelidik profesional dan juga penyedia perkhidmatan dalam industri halal tempatan dan luar negara untuk mendapatkan maklumat berhubung dengan halal. Ini termasuk maklumat berkaitan statistik industri, trend pasaran, pematuhan pensijilan sebagai tambahan kepada penyelidikan kemajuan dan inovasi.

GHSC ini berfungsi sebagai penyedia maklumat, pengetahuan dan data berkaitan halal secara online melalui portal, menyediakan perpustakaan, pusat rujukan serta penerbitan buku-buku dan majalah berkaitan halal di mana pihak industri dan pengguna dapat memperolehi maklumat, data dan bahan-bahan berkaitan halal. Maklumat mengenai halal juga dibekalkan menerusi saluran maya dan fizikal di mana perkhidmatan secara peribadi untuk pelanggan-pelanggan juga disediakan menerusi *One Touch Point* (OTP). Pusat ini menyediakan lebih 200,000 bahan bacaan maya dan fizikal serta mempunyai lebih 1.9 juta pangkalan data dan lebih dari 8,000 bahan rujukan fizikal (buku, jurnal dan sebagainya)

Ahli Yang Berhormat,

Sejak ditubuhkan pada bulan Jun 2012, OTP di GHSC telah menarik lebih daripada 6,300 pelawat dari 56 negara termasuk dari kedutaan, pesuruhjaya perdagangan, usahawan perniagaan, stesen penyiaran dari CNBC dan Kazakhstan, syarikat-syarikat multi-nasional, badan-badan kerajaan, wakil-wakil rasmi dan individu.

OTP, projek asas GHSC menawarkan perkhidmatan meluas yang berfaedah bagi mereka yang sedia ada dalam industri halal dan mereka yang bercita-cita untuk berkecimpung di dalam industri halal. Ia bertujuan untuk menawarkan perkhidmatan yang menyeluruh berorientasi pengetahuan bersepadu.

Sistem *Halal Data Warehouse* yang terdapat di GHSC adalah yang pertama seumpamanya di dunia. Ia diwujudkan bagi melaporkan data-data penting berkaitan eksport halal, pelaburan halal dan sebagainya.

Untuk makluman Ahli Yang Berhormat,

GHSC telah melancarkan beberapa projek pembangunan dalam memberi kesedaran kepada pengguna terutamanya dalam meningkatkan integriti halal. Antaranya termasuk:

- (a) Aplikasi Halal untuk telefon pintar di mana ia dimuatkan dengan direktori halal, maklumat halal, lokasi premis halal menggunakan teknologi yang boleh digunakan menerusi teknologi *Android*, *Blackberry*, *Nokia Symbian* dan *IOS* untuk telefon pintar *iPhone* dan *iPad*. Aplikasi Halal atau lebih ringkasnya 'Halal Apps', yang diperkenalkan pada tahun 2010 melalui *iTunes store* telah menarik minat lebih dari 30,000 pengguna dari seluruh dunia. Sehingga 2013, HDC telah merekodkan lebih dari 100,000 penggunaan dari seluruh dunia dan penggunaan dari dalam negara dianggarkan sebanyak 99% iaitu 99,000;
- (b) Penyediaan laman sesawang bagi kegunaan industri dan rakyat untuk menyalurkan maklumat halal. Ia telah dilancarkan melalui GHSC sejak dari tahun 2010. Dari tahun 2010 sehingga Disember 2013, penggunaan laman sesawang ini telah mencapai lebih dari 63.7 juta pelawat dari 120 negara.
- (c) Projek Saluran Kreatif Halal atau *Halal Creative Channel* merupakan inisiatif bersama syarikat swasta iaitu pakatan strategik tanpa melibatkan bantuan kewangan Kerajaan. Ia membolehkan HDC mempromosi dan menengahkan maklumat halal di kalangan rakyat di samping menunaikan tanggungjawab sosial di peringkat korporat.